

現代十大家詩鈔

第二冊

樊榭山詩鈔

上海進步書局印行

樊樊山詩鈔

午窗坐睡

吾愛頭著枕。美於印懸肘。晴日可一窗。春愁竟何有。欖柳既消食。華池噉且久。茶聲猶在耳。書卷未離手。幾局啜老棋。一中徐邀酒。睡鄉信寬閒。靜者故多壽。借問導師誰。宰予真不朽。吏人前白事。朦朧拒勿受。此心了無着。悠悠忘淨垢。少焉蝴蝶甦。還復為莊叟。

莫愁湖

蕭衍點老公。豔體託麗人。製為莫愁曲。歌者頗生津。遂令石城水。曼膩嬌千春。將柳作腰支。以山當眉顰。六代迄宏光。海枯湖不涸。顛倒滿城客。髣髴遊洛濱。可歎遊觀末。亦罕真賞存。了無川嶼媚。一勺安足珍。白雨忽飛灑。水草生精神。明鏡頓如拭。一洗金粉塵。

元武湖

滄海日以東。江湖日以遠。城頭紫氣盡。城下白波淺。龍子去荒洲。春深荻芽短。逶迤隨崇墉。縱橫抱疊巘。樂游與青溪。自笑蹠滓褊。勝國一紙堆。今日萬家產。賢侯勛業多。豈暇計瀦區。閒鷗樂數澤。白舫洗心眼。欲使清虛露。先將荒穢剪。汙萊畀農漁。蒲荷兼游衍。利害隨時生。陳迹不相踐。葦間貪延緣。浦口暗西崦。

元武湖

曾侯復金陵。首招秦淮妓。幕府多老儒。罕測相公意。十年蜂蟻屯。一旦燕鶯萃。冠蓋來如雲。珍奇

輦而至。臺城火未熄。已有昇平瑞。一水極妍華。一湖獨幽邃。蓮波偶然紅。葦海無窮翠。舴艋浮其間。掃空脂粉膩。惜哉千頃陂。坐等石田棄。白蘇闢西湖。匪直風景事。何當剪汙萊。大興畋漁利。言征蒲藕租。兼啟魚蟹市。方今課實業。早作陶朱計。勿徒營女閭。催納河房稅。

除夜與姊妹侍家母作寒具作

忽見歲咻嶸。春堂炳華燭。比屋照虛耗。千門難爆竹。慈母未即卧。為兒具旨蓄。英粉屑銀泥。井華澆山藪。鏤為玉葉工。糝以脂花馥。我時衣犢鼻。就取鑪頭燠。白炊一云通。椒頌久無復。以身奉槃匱。猶勝膠弦續。阿姊況明惠。有妹皆婉淑。頗能製羹湯。豈惟具茶粥。茲夕百無事。遂有紅綾祝。熱鏤一以翻。煎香達隣屋。捧觴為母壽。佐此杯中醪。嘉客詰旦來。慎莫污畫軸。

抵家

日夕始見塔。到門山月低。老親起逆我。顧我顏色悽。照以燈燭光。憔悴無容儀。哀樂能傷人。況我常羈縻。譬如歸甯女。慰問非一詞。黽勉事他人。安及爺孃慈。區區愛憐心。十倍未嫁時。又恐無久淹。還當成別離。甘滑適兒口。寒煖試兒衣。宛宛姊妹行。誰云是男兒。緊余事遠游。豈曰儔侶稀。至竟骨肉恩。難為朋好移。短褐苟蔽身。菽水甘如飴。吾將掩衡門。又虞猿鶴飢。

燕子磯

洶洶黃天蕩。空曠如巨舟。舟行無憾志。遠指江千磯。鐵骨蒙苔蘚。舒翼昂領頤。翩然來下浴。斗入青琉璃。南北此要津。日有千帆飛。喜其無障礙。登者輒賦詩。豈知白鷺洲。駸駸能東移。古度多改

變迥異梁陳隋。伐荻如伐木。取兗州軍資。青青雖可悅。大觀為蔽虧。蕃舶運瓦輪。外水晝夜馳。內水頓淺狹。竹塢連秧畦。陽侯逞靈怪。沙禽眠不知。昔傳表司空。水神此地尸。喪大連為燕子磯水神今祠內木主尚存巖巖臨溝澮。威福將安施。既失搏水險。遂減翔風奇。利害每相因。世事皆如斯。足然來好事。路壞亭孤危。仰讀設險句。感歎南巡碑。磯上乾隆御題詩有設險詩俯瞰鹽舸商。誰解題好辭。北草鞵夾肉夾江惟鹽船行之行旅皆乘

輪

冥雲送客散。滿山啼畫眉。

磯下多畫眉皆巢石罅內

老妓行

曩為陸子思賦此題定稿時刪去偶檢得之意有所觸改而為此

白門柳色黯然秋。曾扣絲鞭繫紫驄。秋去春來一隻燕。柳昏花暝十三樓。樓中十五盈盈女。能歌吳歌舞楚舞。種出能行白牡丹。教成解語紅鸚鵡。一笑陽城下蔡傾。五陵年少儘逢迎。纏頭擲滿甯知數。狎客來多不記名。世間花月無常好。暮暮朝朝玉容稿。白髮空思宋道君。青娥暗泣唐天寶。墮策曾傾馬上郎。當壚今似魚羹媿。浮梁茶客六十餘。欲折花枝壓衰老。秋花不比春花穠。手持團扇怨西風。薄有風情晚香玉。無多顏色雁來紅。春婆夢境人人有。何獨青樓悵衰朽。龍鍾宰相望三台。猿臂將軍傷左肘。徐娘雖老尚嫣然。傅粉施朱逐少年。已屈蓮花隨武媚。更聞冠玉伴湘蘭。吁嗟乎。夏姬三少知名久。妍媸定有真評否。琵琶亭下退紅花。拂水莊前如是柳。沈吟金縷杜司勳。標榜玉京吳祭酒。君不見身騎駿馬蕭溧陽。出獵常牽柏直狗。

彩雲曲 有序

傳彩雲者。蘇州名妓也。年十三。依姊居滬上。豔名噪一時。某學士銜恤歸。一見悅之。以重金置為選室。待年於外。祥琴始調。金屋斯啟。攜至都下。寵以專房。會學士持節使英。萬里鯨天。驚鷺並載。既至英。六珈象服。儼然敵體。英故女主。年垂八十。雄長歐洲。尊無與並。彩出入椒風。獨與抗禮。嘗偕英皇並坐。照象時。論奇之。學士代歸。從居京邸。與小奴阿福。姁生一女。學士逐福留彩。寢與疏隔。俄而文園消渴。竟夭。天年。彩故與他僕私。至是遂為夫婦。居無何。私蓄畧盡。所歡亦殂。仍返滬。為賣笑計。改名曰賽金花。蘇人公檄逐之。轉至津門。雖年逾三十。而豔名不減疇昔。己亥長夏。與客談此事。因記以詩。先是學士未第時。為人司書記。居煙臺。與妓愛珠。有嚙臂盟。比再至。已魁天下。遽與珠絕。珠冤痛累月。竟不知所終。今學士已矣。若教鬼饒。燕子樓空。唱金縷者。出節度之家。過市門者。指狀元之第。得非霍小玉冥報李十郎乎。余為此曲。亦如元相所云。甚願知之者不為。而為之者不惑耳。姑蘇男子多美人。姑蘇女子如瓊英。水上桃花知性格。湖上秋藕比聰明。自從西子湖船住。女貞盡化垂楊樹。可憐宰相尚吳絳。何論紅紅兼素素。山塘女伴訪春申。名字偷來五色雲。樓上玉人吹玉管。渡頭桃葉倚桃根。約略鴉鬟十三四。未遣金刀破瓜字。歌舞常先菊部頭。釵梳早入妝樓記。北門學士素衣人。蹙踏毬場訪玉真。直為麗華輕故劍。况兼蘇小是鄉親。海棠聘後寒梅喜。待年居外明詩禮。兩見瀧岡墓草青。驚鷺絃上春風起。畫鷁東乘海上潮。鳳凰城裏並吹簫。安排銀鹿娛遲暮。打疊金貂護早朝。深宮欲得皇華使。才地容齊最清異。夢入天驕帳殿遊。閻氏含笑。

聽和議。博望仙槎萬里通。霓旌難得彩鸞同。詞賦環球知繡虎。釵鈿橫海照驚鴻。女君維亞喬松壽。夫人城闕花如繡。河上蛟龍盡外孫。虜中鸚鵡稱天后。使節西來屢奉春。錦車馮嫫亦傾城。冤旒七毳瞻繁露。繫敦雙龍贈寶星。雙成雅得西王意。出入椒庭整環佩。妃主青禽時往來。初三下九同遊戲。妝束潛隨夷俗更。語言總愛吳娃媚。侍食偏能饜海鮮。報書亦解繙英字。鳳紙宣來鏡殿寒。玻璃取影御牀寬。誰知坤媪山河貌。祇與楊枝一例看。三年海外雙飛俊。還朝未幾相如病。香息常教韓壽聞。花頭每與秦宮並。春光漏洩柳條青。即主空嗔梁玉清。祇許大夫驅便了。不教琴客別宜城。從此羅幃怨離索。雲藍小袖知誰託。紅閨何日放金雞。玉貌一春鎖銅雀。雲雨巫山枉見猜。楚襄無意近陽臺。擁衾總怨金龜婿。連臂猶歌赤鳳來。玉棺畫下新宮啟。轉塵王郎長已矣。春風肯墜綠珠樓。香徑還思苧蘿水。一點奴星照玉臺。樵青婉孌漁童美。總帷尚挂鬱金堂。飛去玳梁雙燕子。那知薄命不猶人。御叔子南後先死。蓬萊難栽北里花。明珠忍換長安米。身是輕雲再出山。瓊枝又落平康里。綺羅叢裏脫青衣。翡翠巢邊夢朱邸。章臺依舊柳毵毵。琴操禪心未許參。杏子衫痕學宮樣。枇杷門榜換冰銜。吁嗟乎情天從古多緣業。舊事煙臺那可說。微時管蒯得恩憐。貴後萱草成棄擲。怨曲爭傳紫玉釵。春遊未遇黃衫客。君既負人人負君。散灰扃戶知何益。歌曲休歌金縷衣。買花休買馬塍枝。彩雲易散琉璃脆。此是香山悟道詩。

緬甸貢象歌

穀皇中興神武姿。雲臺列宿爭驅馳。掃清六合見日月。稜威遠怖西南夷。累朝恭儉踰唐宋。靈禽

瑤珥知何用。千里無勞汗血來。炎方詔罷明珠貢。獨有鳴鐘動天闕。端門馴象森成列。林邑當年入貢時。銀鞍赤鬚真殊絕。水草頻經內苑春。毛膚老作西山雪。立仗通明二十年。玉河照影嗟衰繭。前年南越震天威。蠻奴騎象來逶迤。麟輅垂鼻致闕下。始覺鹵簿生光輝。緬人魑結阻滇海。毒草金潏春不改。望氣遙知有聖人。碧雞金馬神光在。國中育象五百匹。游牧川原騁奇逸。每以春秋教耕戰。直令虎豹慚毛質。國君呼象與象語。汝往天朝定官汝。三品應能飽芻豆。百年莫復思鄉土。就中七象憑點頭。別羣灑泣從其酋。漏天淫雨迷印笮。十月炎風渡憂鳩。六牙欵塞滇中駐。鼎湖弓箭驚非故。雪裏如聞鶴語悲。日南殊切龍髯慕。堯舜欣聞在掖庭。蠻中舞獸還爭赴。湘水如浮雪嶺來。黃流不待堅水渡。雕題比去朝明光。豐觚酌酒調笙簧。褚衣歸遺天家物。玉帶遙頒異姓王。前年象入黃山苑。七象今來喜相見。立向金鋪那可分。賜來法酒羣相勸。出浴爭翻太液波。經行似製吳門練。萬衆天街仰面看。纖離騄駼誰能羨。遠人歸去百蠻中。為述天語宣皇風。冠裳漸解思中土。膜拜猶來祝兩宮。久已桄榔成互市。更拋銅鼓事春農。即看榆澤催耕日。莫論昆明象戰功。

自題小影

時客滬上

春後孤花病後身。渡江洗馬減風神。十年前事誰能記。洛下羊車看壁人。臙脂作粉玉為煙。舊夢星星記不全。無恙金樽無恙月。可憐人不似當年。絲絲煙柳拂江潭。重訪春申駐玉驂。苦帶謝家山澤氣。無人知在玉堂間。

絲絲煙柳拂江潭。重訪春申駐玉驂。三十三年流水去。任留小影在江南。

有贈

朝來選飯每含顰。杏酢梅酸味較親。手結香蘭嬌不起。含詞微示女醫人。
文君新嫁倦梳妝。薄晚簾櫳見睡棠。含得玉魚猶病齒。白甌重進地黃湯。

除夕寫懷八首

外戶新懸鬱壘符。梅花別院上燈初。年光轉盡車輪裏。秣馬聽雞到歲除。

強御屠蘇弟二觴。

同人中准子謹
年最少余次之

聊依舊俗一瀟裳。旁人莫怪襟懷惡。破例今宵在異鄉。
余客中
度歲自

始今年

隱侯中歲益虛孱。酒渴琴癢卒未刪。但得明年春病較。盡將藥裏施人間。
小閣唐花供歲寒。燭來十日半凋殘。人生顏鬢無長好。記取明朝把鏡看。
家書寄我小寒天。柳已稊時始到燕。隔歲寄將雙鯉去。到時應在百花前。
斷帶鴛鴦有舊恩。淚封塵積至今存。轉頭十二年來事。能得香衾幾夕溫。
促坐分曹罷送鉤。酒闌重與賭牙籌。人生事事都如此。一擲盆緋即狀頭。
誓逐班生出玉門。不然奇服返江村。誰能一世青衫底。銀燭清樽照淚痕。

寓言七首

七國雌雄未可知。翩然黃綺是吾師。早知秦鹿難收拾。萬壑千巖訪紫芝。

五噫歌成始欲愁。恁春夫婦自溫柔。班生九等分人表。擬署梁鴻第一流。
棘裏銅駝那忍看。王尼居處露車寒。請君留眼觀滄海。處處橫流總不安。
子真仙尉足風流。攬結烟蘿傍虎邱。官職聲名俱妥貼。更將嬌女託羊裘。
秦人洞口問桑麻。箇是斜川處士家。爭怪南陽劉子驥。一生心事在桃花。
楊李紛紜世苦兵。河分兄弟獨聲名。讀書雅慕東皋子。有酒惟同河渚生。
清渭盈盈一水中。大蓬封邑至今雄。才高迹近愁牽挽。莫被新安料放翁。

前詩以金粉綺羅寫西湖唐突西子矣別賦十二章寄藍老

西子剛宜淺淡妝。山眉水眼費端詳。但看周昉屏風畫。豈識名山有道場。
妙手伊誰為寫生。香山以後又端明。明湖恰與明妃似。意態由來畫不成。
水有畫船難到處。山當綉幃未來時。白沙翠竹人烟少。獨自拖藤意可知。

曙色僧窗猶未分。漁僮踏浪綠沄沄。湧天水氣欲為雨。一半樓臺隱白雲。
竹香如霧不論竿。三五禪人涉翠寒。虎跑清泉龍井葉。斬新槐火烹來難。
三十年前諸遲
菊所說如此
入關香味頗減
越

朝遊三竺暮還城。風景何人識晚晴。無數綵船歸去後。婆官吹笛兩三聲。
山寺歸來月挂松。水烟四合綠濛濛。西湖別有閒亭榭。不在屏山十景中。
不識漁舟一葉輕。紫髯燒燭坐調笙。孤蒲深處蓬籠雨。朝貴耳邊無此聲。
不應城外即孤山。雪後傾都犯曉寒。此事林逋殊不料。梅花種與俗人看。

南屏僧飯小淹留。疎筍酸寒夏亦秋。二十年前湖上事。每隨夜雨上心頭。癸未四月同鶴士子珍湖樓聽雨如昨日事
投簪擬謁辨才師。鉢帽隨緣住淨慈。埽地打鐘俱不會。飽餐山蔌坐填詞。
聚似疏星散似烟。湖山回首意茫然。欲窮水曲松深趣。且可雲棲住十年。

江樓雜憶

江流和月影迢迢。樓上何人倚玉簫。忽憶真珠亭畔事。一彎涼月柳千條。
酒薄天寒損帶圍。玉人添火閉春扉。當時曾傍薰鑪坐。過了梅黃未浣衣。
青鳥殷勤與致聲。微波嫋嫋向前橫。當時各抱聽冰意。遙隔銀河過一生。
催上蘭舟百感生。一宵難道是離情。玉環分付無多語。卻坐衾窩想到明。
月圓花好尋常事。想到歡娛恨轉多。何必天涯在門外。分明心上有秋河。
滬上雜詩

金婆巷口問兜家。玉女窗西日未斜。小玉應門渾不是。一時惆悵對桃花。
阿閣三重靜掩扉。綠陰如夢鎖威蕤。舊時梁燕雙雙去。一桁珠簾到地垂。
小桃花下別開門。閒踏青苔訪玉真。瞥見鏡中金翠影。斷無人似李夫人。
水晶簾下晚妝殘。鳳紙宣名條幾番。卻坐鏡臺嬌不起。對人梳掠恣人看。
平時相見道勝常。隱約將飛亦未翔。自隔微波通一語。不容花下細端相。
一樹垂楊付碧流。水萍風絮兩悠悠。無端繫得青驄住。乞與蛾眉一世愁。

小立香街月子微。夜寒如水不添衣。香車過盡琉璃暗。纔繞花牆獨自歸。
來是春寒去尚寒。匆匆一月蕙花殘。橫塘時有驚鴻過。祇是當前駐影難。

湖上雜詩

雲容波態世間無。評泊還當勝畫圖。能寫吳宮西子照。此生纔可賦西湖。
松水依稀似舊容。前身曾打理安鐘。卅年何限紅塵夢。消盡茶條草屨中。
燒丹葛令還留井。度曲花翁亦有家。我愛孤山林處士。不將禪草換梅花。
手炷香鑪禮岳祠。更摹松柏認南枝。如今略換人間世。為遣橫枝莫向西。
白白沙隄抱阮墩。一雙太傅至今存。年年湖上秋如錦。惟有荷花解報恩。
梅子青青不滿枝。楊花白白復沾泥。茅家埠口燒香路。常有幽禽自在啼。
松檜陰濃掃不開。冷泉亭上幾徘徊。人間真有清涼地。但挈茶瓢坐具來。
泉到笈光比玉醅。脫巾洗手坐苔茵。天生一片玻璃水。不遣靈臺着點塵。
酒樓旁帶綠陰斜。四月軒窗已換紗。風味不嫌清到骨。湖心藕粉井西茶。
蠶豆珠蝦入饌新。一甌碧玉薦湖莼。不緣肺腑清府極。解喫吳羹有幾人。

畫舫金樽對水開。萬錢一擲定無回。清游只合瓜皮艇。更袖瓜犀豆子來。

湖上風氣侈靡一日之費動至數金每與子珍

約不得以厨船自隨准費一小艇
餓則掬湖水嚙瓜子炒豆而已

淡晴微雨間輕陰。閱盡湖光淺與深。只欠月明西澗寺。攜茶來聽穎師琴。

湖上晴雨百變略已歷盡惟欠月下泛舟耳

舊雨長安數舉杯。新來無分共岑苔。明朝待續南屏社。為約高三十五來。余京華舊雨杭人嚴多。今來湖上惟見高白叔。

到處禪房帶雨敲。他時說也殼魂銷。佩聲夜夜金釵卷。帽影朝朝錦帶橋。寓杭十日湖上凡六七。至至必流連盡日暮則。

入湧金門宿金釵卷而歸

潛江雜詩十六首

淼淼平湖五月秋。外湖水入裏湖流。頭銜合署青溪長。問字亭邊有釣舟。肉食堪憐骨相乖。閉門旬日學清齋。江鄉四月初生筍。強飯須逢謝豹來。

潛人以鹽漬紫蘇佐饌味極清美

十畝回塘歲有租。閒時留客飯秋菰。湖田薑蔗年來薄。更課山僮種紫蘇。羹湯酷愛吳兒製。黃蜋青螺別樣甘。為底居人工噉蚪。甘鬆渾不似江南。

白鶴樓中四面窗。白鶴樓下清溪長。田田盡種青荷葉。十里風來併是香。

女兒垂髮采雕胡。愛弄輕舟引白鳬。聞說石城工盪漿。一時凝望莫愁湖。石城女子盪舟獨異相傳是與獻王妃所教

妾家三板橋頭住。郎住青谿一里強。驗取湖中新種藕。聰明肯信不如郎。馬場湖東為三板橋相傳湖中藕多一孔

戴勝飛時紫萼勻。錦坊愁煞買絲人。飛花盡織丁娘布。春絹秋羅不稱身。

細布絳纊五色齊。寒房刀尺思依依。紅藍與作合歡魚。白還縫游子子衣。

雨蓋輕於出水荷。垂衣面面剪青羅。琵琶飯甌君休笑。入市無如傘戶多。潛人多造傘者俗呼傘為雨蓋

城北城南一里餘。踏莎來就子雲居。歧亭監稅風流在。不遇東坡亦借書。城北萬氏藏書頗富

桂樹秋分始著花。山房清曉拓窗紗。淮南招隱何人會。祇有城西處士家。

城西處士家。為吳孝廉故居。

薄薄城內二頃田。青鷄白鷺鏡中天。一年一度桃花水。苦累兒家買釣船。

潛江歲有水患。比戶多置舟楫備潦。

建磯歲歲渾無力。挽月年年亦未成。生把金錢擲流水。不堪頻聽打碓聲。

客舍經秋復歷冬。讀書常得兩生從。荒臺寂寞雙龕火。律院森沉幾度鐘。

滿舍東偏為說詩臺。甘索二生讀書處。

前輩風流手蹟真。探花淡墨想丰神。祇今蕭寺梁間月。合與蘭亭一樣珍。

城北法雲律院為王夢樓先生流寓處。寺中手

蹟甚夥。

萊山公子花燭詞二十首

玉簫金管動層城。冰泮前頭合兩星。知是飛瓊今日嫁。百花都帶合歡鈴。

青鳥銜來一尺書。美人嗚佩別姑蘇。玉梅花下吳船小。寫出金閨送女圖。

見說鈿車駐外廂。禮華猶是女兒妝。大家故是無拘束。親寫銀鈎教小郎。

昨見鸞書下紫宸。劉樊真誥自天申。仙郎一例蒙恩澤。端整泥金寫告身。

玉房暖女卜佳期。雲帔珠衣百樣宜。小玉催人佯不起。水仙花畔上頭時。

百輛迎歸夾道看。眾中嵇鶴最軒軒。當頭騎出連錢馬。卻是他年小狀元。

瑤池侍女各嚴妝。銀勝金幡列兩行。報道上元冠帔入。萬花圍繞上金堂。

紗障輕披卸耳珠。低鬟轉面故生疏。小時來往烏衣邸。竹馬青梅記得無。

衣桁藏燈漏始分。真珠帷帳幕如雲。依稀朱鳥窗中語。只有釵梁小燕聞。

合勸燭下面初勻。待曉堂前贄股榛。先日果盤端正好。徧將花麝散諸親。
嬌養娉婷出左家。仙郎風頰勝朝霞。芙蓉鏡裏雙雙影。只算人間姊妹花。
郎君善畫桃花馬。亦解鋪藤貌遠峰。今日綠窗檢眉史。春山卻在鏡屏中。
灑埽官厨等衮妝。調羹纖手勝吳娘。阿翁總說江南好。魚膾居然似故鄉。
久識君姑是女師。玉枰消夜偶彈棋。要他兒女知辛苦。細說青裙挽鹿時。
埽眉才子好風神。繡閣朝朝染翰新。生長江南煙水地。學書都似六朝人。
小閣疏香護玉篝。寒清酒淺話蘇州。何郎偶製梅花賦。觸撥閨人念虎邱。
芸帙緗函滿畫厨。紅閨開卷月來初。玉臺不少宮閨體。第一先溫女四書。
雞鳴時候點茶甌。催起檀奴索臂鞦。計日剛逢巾卷會。那容妝閣看梳頭。
沙哥臨別小淹留。卻坐青廬慰問周。筆硯未開離緒亂。倩郎作字寄蘇州。
細寫蠶書上畫屏。道人苦趣愛吹笙。防他背倚紅鸞笑。莫遣雙成識姓名。

冬日即事

政拙慙時譽。交疎結古懽。老知為善樂。貧覺去官難。持酒從僧飯。將書就月看。
蓮花峰頂雪。來作縣廳寒。

益壽資靈藥。齋心轉念珠。手書美人賦。貌入醉僧圖。桑菊堪明日。酴醾笑汚鬚。
身同子由瘦。誰勸食花豬。

家世儒兼俠。飯依佛與仙。兒傳克敵弩。妻蓄飯僧錢。古器勝金玉。書聲當管絃。龐公及郭令。併作畫圖傳。

大子徒希簡。髯翁愛和陶。將詩為日記。以酒當年勞。女慧雕紅紙。兒驕炫錦袍。燈前側紗帽。親手煮松濤。

政令如冬日。風光愛晚霞。百園養喬木。盈尺蓄硃砂。身是拔心草。官如寫意花。縣庭落蘚積。何異野人家。

展畫雲頭活。煎茶粥面濃。解饒糟郭索。養胃蜜門冬。玩鶴常摩頂。憐麋不取茸。庭階生意足。春草又惺忪。

盆裏紅梅樹。參差倚畫欄。花疎饑雀啁。牕暖凍蜂彈。坐久從香燼。閒多借畫看。吾廬好風日。松竹盡平安。

閭井安耕鑿。潢池息弄兵。買牛秋有穫。吠犬夜無聲。民樸須知學。官清要近情。何須刪鄭衛。歌舞是昇平。

秦俗好演劇
余弗禁也

余讀北史最喜高神武過鄴屢賦其事今再詠之

英雄投袂起鮮卑。風誼機權見亦稀。看斬亂絲心自許。能馴惡馬衆爭歸。飛龍膝下三英主。落雁宮中幾玉妃。欲訪香姜求片瓦。屋山金字已全非。

示及門諸子

名場亦有信天翁。與世推移道不窮。未敢薄今仍愛古。不遑救過肯居功。新奇論說中年悔。貴壽文章後路豐。打點儒林根柢事。狂華客慧一時空。

題石甫詩集即送之江左

不將鄴瓦為君硯。那稱陳王繡虎才。三日耳聾龍翼簾。彌天雲起蜃樓臺。一春芳草王孫去。六代青山幕府開。嶽嶽樓船滄海上。凌風能不望蓬萊。

咏史四首

四海饑虛賦大東。孔桑箕斂意無窮。雞豚簿錄茅檐底。猿獍圖形紫閣中。朝士競攻皇甫鏞。深宮終相宇文融。封椿枉斂民錢盡。艮嶽崔嵬紀汝功。

韓富同心翊紫宸。爭墩人已偏樞鈞。熙甯久困誅求令。元祐稍還老大臣。介甫晚年疏福建。堯夫先見警天津。回思橋上啼鵲淚。猶是人間慶曆春。

家國蝸蟻兩不安。誰云叔寶獨無肝。功名上苑馴羊易。賓客南園作犬難。執拂伎更男子服。趨庭兒弄婦人冠。秦宮花底垂垂老。猶當髯叅一例看。

甘陵舊事已成塵。牛李而還蜀洛瞋。鉤黨劇於河北賊。從官多作嶺南人。誰能獨直烏臺案。甯不寒心白馬津。解黜荆舒相司馬。古來惟有一宣仁。

箇人

白石金堂靜掩扉。香車緩緩未成歸。眉娘自比初三月。色子心憐第四緋。半夜濃薰聞茉莉。一年